



LE GOUVERNEMENT  
DU GRAND-DUCHÉ DE LUXEMBOURG  
Ministère de la Justice

Luxembourg, le 20 JUIN 2017  
Réf. N° QP 28/17

Monsieur le Ministre  
aux Relations avec le Parlement  
p.a. Service Central de Législation  
L-2450 Luxembourg

**Objet :** Question parlementaire n° 3006 du 18.05.2017 de Monsieur le Député Fernand Kartheiser

Monsieur le Ministre,

J'ai l'honneur de vous faire tenir en annexe la réponse à la question parlementaire sous rubrique.

Je vous prie, Monsieur le Ministre, de croire en l'expression de mes sentiments très distingués.

Félix Braz  
Ministre de la Justice

**Réponse de Monsieur le Ministre de la Justice Félix BRAZ et de Monsieur le Ministre de l'Éducation nationale, de l'Enfance et de la Jeunesse Claude MEISCH à la question parlementaire n° 3006 du 18 mai 2017 de Monsieur le Député Fernand KARTHEISER**

Virewech wëlle mer lech matdeelen, datt mer opgrond vun den Ufroen betreffend den Artikel 28 vum Nationalitéitegesetz vum 8. Mäerz 2017 bei de Gemengen, der Justiz an der Educatioun feststellen, datt vill vun de Leit déi fir dës Dispositioun a Fro komme ganz gutt Lëtzebuergesch schwätzen an anerer schonns, wäit méi wéi 24 Stonnen a Lëtzebuergeschcourse waren aus perséinleche Grënn oder am Kontext vun hirer Aarbecht. Mir ginn de Moment dovunner aus, datt dat méi wéi 50% vun deene sinn, déi bei eis nofroen.

Mir waren eis vun Ufank u bewusst, datt déi Leit, déi fir den Artikel 28 a Fro komme, keng homogen Grupp si par Rapport zu hire Lëtzebuergeschkenntnisser. Duerfir hu mer och drop verzicht, een eenzeggen an eenheetleche Programm auszeschaffen.

Den Institut national des langues huet zënter dem 1. Abrëll 5 där Coursen organiséiert, wou sech insgesamt 125 Leit ugemellt hunn. Vu datt ganz vill verschidden Niveauen am Cours präsent sinn, gëtt no engem Kaderprogramm op eng interaktiv Manéier geschafft fir déi, déi e gudde Lëtzebuurger Background hu mat deenen, déi wéineg oder kee Lëtzebuergesch kënnen, schaffen ze dinn.

D'Programmer vun den konventionéierten Träger vun der Erwuessenebildung (Service de la Formation des adultes), déi vum Minister guttgeheescht ginn "programmes agréés par le Ministre", mussen dësse Kritären entsprechen:

- D'Zilgrupp ass definéiert (Ufänger oder Persounen, déi scho gutt schwätze kënnen).
- E Programm mat Léierziler (wat d'Leit um Enn kënnen) a Formatiounsinhalter ass festgeluecht.
- Um Enn vum Cours gëtt en "Certificat de participation" vum Träger ausgestallt, dee garantéiert, datt d'Leit effektiv 24 Stonne präsent waren.
- De Cours huet mindestens 30 Stonne, fir mat anzerechnen, datt d'Leit mol déi eng oder aner Sessioun verpasst hunn.
- Eng formell Iwwerprüfung vun de Participanten ass net obligatoresch an och am Kader vum Artikel 28 vum Nationalitéitegesetz net virgesinn.

Deenen do Kritären entsprechen d'office d'Coursen, déi a Lycéeën ofgehale ginn, an d'Coursë vun de Gemengen a Veräiner déi zënter Joren eng Konventioun mam Ministère hunn, an deenen hir Coursen all Joer erëm den "label de qualité" vun der Erwuessenebildung kréien.

Opgrond vum Nationalitéitegesetz gi mer och kommerzielle Formatiounsträger a Firmaen d'Méiglechkeet, no deenen uewe genannte Kritäre Coursë vum Minister agreéieren ze loossen.

Wat mer net kënnen akzeptéiere, si Coursen, déi vu Privatpersoune baussent engem gereegelte Kader gehale ginn oder wann een e Cours, mat engem Programm deen op 50 Stonnen festgeluecht war, no 24 Stonnen verléisst an dann eng "Attestation de participation" virleet.

Wat Attestatiounen vun engem Sproochenniveau ugeet, do akzeptéiere mer den offizielle Sproochentest vum INL an och d'Attestatiounen, déi vum Staat ausgestallt ginn am Kader vun de Sproochenexame fir d'Kandidate vun der Fonction publique. A béiden Fäll ass jo, duerch eng offiziell Examensprozedur, garantéiert, datt déi Leit e wäit méi héijen Niveau hu wéi een duerch e 24-Stonnen-Cours kënn erreechen.

Wéi schonns am Ufank gesot, ass d'Zuel vun de Leit déi scho Lëtzebuergesch geléiert hu ganz héich. Hir Zertifikater gi vum INL resp. vun der Erwuessenebildung validéiert, wa se de virdru genannte Kritären entsprechen. Da kënnen si den Zertifikat mat den anere Pabeieren direkt op hirer Gemeng erarechen.

Zënter Ufanks Abrëll hunn den INL an d'Erwuessenebildung e puer honnert Zertifikater validéiert.

Wat lo déi Leit ugeet, déi nach kee Lëtzebuergesch geléiert hunn, an déi, déi keen Zertifikat kënnen virleeën, stelle mer fest, datt d'Leit motivéiert sinn ze léieren an datt se dacks esouguer bereet sinn, e bësse méi Stonnen ze maache wa se séier e Cours fannen, deen an hirer Géigend ugebuede gëtt. Virun allem wat eeler Leit ugeet, hu mer en Appell gemaach un d'Gemengen, fir do lokal Coursen unzebiden.

Zënter Abrëll ënnerstëtzen a beroden d'Mataarbechter vun der Educatioun déi Bierger, déi ënner d'Dispositiounen vum Artikel 28 fale wat de Sproochecours ugeet. Dat sinn Honnerten vun Uriff an E-Mailen an och vill Leit déi mat hiren Zertifikater laanscht kommen.

Déi Leit ginn net registréiert, well déi offiziell Prozedur jo eréischt mam Dépôt vun der Demande op der Gemeng ufänkt.

Op de Gemenge si bis dato 253 Optiounen op Basis vun Artikel 28 aktéiert gin sin.